


www.BibleForChildren.org


Matyu 26



Afo yuhre
6-pela yiham
Pasofa burwathu
rhuyuk yiham afo
ruhetmn Jisasr
Betaniko yimor. Nd
kmi Betanit, Jisasr
kasinyamo yima Lasarusrhu
kmiyet. Mariat nd bro
marukfoyet sanda knt
yakhato Jisasrhu wuram
fuk wunamotr. Yuk wunanihato tfit
tuthu yuke tmarifaye trk domtmotr.
Nd sanda knt yuk wunamohat mtha yarfon
gbefr yuht kunys thu kasi bugamort.




Nd yiha 12-pela disaiperrroh wom disaiperr kutewumr
Judas Iskeriotr prisroh bro yimampno yimor.
Yihato kfo memorm, "Inji inji
hndhnaruhanr." Nd bro prism
wanyhato yindhormom.
Yindhorhato kfo memomr,
"Maruha hirahnomn."
Judasr wanyhato
yima yuhur fak
nhtamourr
Jisasrhu
hndhna
yuham.



Be disaiperm Jisars kfomo yuhatn
fak hikmomn Pasofakfot ror
kfomo tkittn hta mskamomt.


Nuwa ye hasohato Jisars
bretpat yakmortn Bro
Nkifrar wukfo yindhornimorrn
yak tif nhombrahato
disaiperm he nhombrahi
hanymorm. Kfo memorm,
"Nd bretpam
wayak
wayakomm."



"Ndm nanhu nmpayem." Wain bu
kaft yakmortn nhaf Bro
Nkifrarprno kfo yindhornihato
kfo memor, "Niko bugako nda
wain bu kaft wayak wayakomt.
Ndm nanhu kkupayem. Yimaroh
fasoh fasoh nefroh yak thuyuk
nfri yihotar bi tfit yimayanhu
kkupaye kak dbkafwanr.




Jisasr sinyahato Saimonr kfo memorr, "Saimon,
Saimon! Wawany. Satanr niahato ninhu yima yuhur
wastiwonrahn. Tu Bro Nkifrarhu dukefrparpno
rhurahrne nhai? Bro Nkifrar bi kfo fakiowafmorr
ninhu nia wastiwonneft. To ni Saimone mirahn duka
yanhoya. Na kfo tatiwanr Bro Nkifrarko. Ni buha wom
nefmn misuh thombat
nhai be wundiat
suhniruhahn tfit
mkekutrah. Tfit
bi mkekutekn tfit
yihato wom
yimatm kfo
bmta mrokfom
wahitwanm."



Pitar tfit sinyahato Jisarr memorr, "Broye, na yibonwa ninpno kalabus yinyeft yo ni nohneft na yibonwa ninpno rpat nohneft." Tfit Jisarr sinyahato kfo memorr, "Pita afo wawany. Hrek yifungt yimam ttiwonrahmn ninhu nanpno rpat tohneft afo kfo namhirahn. Kfo namhitwonm kangnm, 'Na nhai nd yimar tawisafkahanr.'

Inji kfo namhihany,
kfo namhi
hanyruhann
husfirpehyuk kfo
namhi tngtpno
wanyrahnr
krir nakurahr."




Jisasri disaiperm afo
Olifet kmit tohetmn
yimom wom tkitt
kutewumt Getsemani.
Ndha Getsemanit
mfnahhato Jisasr kfo
memorm, "Asha afo
warhu hasoko. Na afo
Bro Nkifrar rim kfo
bruttnefiwa."



Kfo bruttna hanyhato kfo
memor, "O Dajaye, ndar
bbinysofthu yimaroh
fasoh nefm na be hta
krhorhotma nann
nohruhanm. Bi
brboh Watt kanga
akfoyanm. Nd krho mis
na yakruhat kangn ayak
tuhant, be hifa, na
yindhorwa. E nhai, kangn
ayakrt, be nhai mrokfom,
yakruhant. Na be ninn
yukatohruha. Kangn,
finji anaya, nhai mrokfom."



Ndnettn Judasr to be nd yuhatn hanymorm
Romroh soldiami polism. Polism prisroh bro
yimami Farisim kfo tkrurafmomm. Yahrt
tohyuk kfra inyarut yo kshn rpat
fakitohakmomm. Be inji
yuhre nnakfo ptha hanymom
Jisasr fakakni twanhomomr.
Be wom disaiperr inji htihatn
sinyamorn prisroh bro
tohak yimarhu hingrna
yimar bainate tirmifkorhof
yimhindangt
frbubafmotrr misuhmot.




Be Jisasr nd yimarhu yimbhindangt inji
htihato turhu disaiperm fak
dbohfamorm. Be nd yimbhindang
duha yimar Jisasr rim tohnihato
tir htamort nd yimbhindangt
ffit nathu nanyjhomot.




Jisasr pthanimotr fakmomr. Yakhato be hanymomr.
Hany hanymoumr Pitar, ror be nhowi mongkongotn
fau ss hik hanymourm. Jisasr hanyhato
hanymomr prisroh bro
tohak yimarhu kunysn.
Nd prisroh bro tohak
yimarhu kmifarn kaht
yimam tenghato
haunyo hasomom.
Pitar nhowi
yimorn rompno
mruhaknimor.



Tfit nd bro tohak
prisrhuwom hingrna
yimar tohhato Pitar
kfo ttiwon memorr,
"Ka ni ndar yimann
mswirt yihof htiroya?"
Ror nd Pitar yimbhindangt
frbbomo yimarhu yimater.



Ror tohhato htimorr
Pitar sinyahato nd
prisrhu hingrna
yimarhu yimbhindangt
frbbomohat ndnetrn
inji kfo ttiwonmor.
Inji ttiwonmotrr tfit
wompam Pitar kfo namhi
memor, "Nhai." Pitar inji kfo
namhi hanymor krir nakumor.
Nd mrokfot dukakhato briaahako
fnahnihato nhai nur ttifarmor.




Juda kaunserkfothu kaunser yimam
sinyahato Jisasr yaknimomr
hanyomomr Pailatrpno. Pailatr
sinyahato Jisasr kfo ttiwonmorr,
"Nine Judaroh kinge?" Jisasr
memor, "Uwa. Mrokfot
to bi kfo twanhiwunt."
Tfit wompam Pailatr kfo
memorm, "Jisasr fnahni
kitwor. Nhai yorhwatr."



Be inji kfo hanyomor. Be watabrurhakmorm. Waniak waniakhato kfo memom, "Bgre misn wakihegirkomr! Bgre misn wakihegirkomr!" Nd yimaroh tngm be nndo grmim yakitohmoamn memoum, "Be yudbat atayifuhakninomr."



Pailatr be Jisasr yakhato kfo memorm,
"Asor Jisasr. Bi tukmoh tirmn htewanr.
Tukomn wakihegirtwakomr." Inji
kfonihato soldiaroh tirm htamorr.
Be Jisasr fakni hanymomr. Rorhu
tuhegiryuk bgre mis tur tita hatohta
hanymort. Kmi taunt htanymortn
wom kmi mfhat kutewumt yima Mfha
Tpit, ndha hanymort. (Hibrukfot
futamoumt Golgotat.)



Ndha bgre misn tir wuram nire
frdbkafhato yuht bgre miyetr
kasinyahato tou fopmomr. Wom
hus yimaf yakmomf bgre
miyetrf mano
mano tohmof.
Womr tirmifko,
yo womr
kindonko. Jisasr
buha tohmor.



Be inji yarbon tiftu rhu hanymotu marr tri kilok
yihom toh hanymor Jisasr mfaknimor. Wuroh myakni
yibonruha turhu yifem Bro Nkifrarko naku tau
ttinimorr, "Bro Yifeme, na bi
toya bi niewa wamiyakna."

Nd Bro Nkifrarhu
temperrhu tu Nngrajoh
Hnaru Gnanhehr gna
rafomoa rmonthat yimar
mfakni hanymor, nd
rmonthat rpat buha
foh tnehmot. Buha
yoh tnehhato
nmbuhaf mano

mano rim rhu mrhumof.



Judaroh taun Arimateathu wom
yimar tohmour. Rorhu yufat
Josefr. Juda kaunserkfot
rorn nd kaunserkfot
hingrna tohnhomourm.
Bok met yindarim
rorhu nefm hifa
hti wofnmoumm.

Josefr Pailatrhu
tngt wany marnya
tanyhato yimorn
nfri ganyom
rmonthar
wiknakmor.



Nd nfri rmonthar yak nyingt
htatahato Jisasr bgre miyetr
wuyak kasuhakmorrn ganyom
rmontharn wahtahato rir
hmbremorr. Rir
hmbreyaknihato
hanymorr.
Hanyhato tahi
muhtn rihtamorr.

Nd tahi muhtn
htamorrn tahis
yakhato tahishu
muht hta
tittafmort.



Tfit hwe nfha ndwom marrn, ndr tu
Sabat yiharn, prisroh bro
yimami Farisim yimom
Pailatrhu htit. Yihato kfo
memomr, "Bro yimaye,
nom dukewunomt
wom mrokfot nd
brurmahr yuhre
yima nfrir



tohhato
kfomot."



"Kfo memor, 'Na husfirpa marm
rhunihato tfit sinyaruha.'

Be inji wany hik marnya
tanyhato yimom. Yihato
nd tahi muht tahiye
frkih marnyamomtn
makkfot htamomtn
yopthu toh
yukatohyuk

soldiam
htamomm."



Sabat yihar rhunimomrn tfit wom
nfri wikrhu barkof yiharn marr
yuhre mwondh hanymor,
Makdala efkot Mariati
wom Mariat yimof
yopthu htit. Nd metf
yi hanymof, yudbat
nunes tonemot. Nd
nunespno Brorhu

mounmotr
hefenko wutoh
tanyhato nd tahi
muht frtasifmo
tahis rihtafmortn
yura tahis
mrhumor.



Soldiam inji wahtimohat nhai
yimam rhurmom. Yafotham
frbrirakhato tuha
wawutthamohat memom
nndo ginunes kekwo tm.
Yimam noheh yimam
kanjo rhurmom.



Nd yopthu htit yiyuk metf, mounmotr
kfo memorf, "Nifn mirahfn
ayakrmanyo. Na htitanfn nifn
nd bgre mis kihegirmo yima
Jisasrhu hti hambrot
niefn. Mirahfn ka wom
asor. Nhai. Be bi
sinyanir tur kfomo
kanjo. Afo wania

wahtifnt ror
htamo tkitt."




Be nd yimar htamo tahi muht yakrmenano
htanymoftn yimof. Wom yima yuhur
fakrmemof, tfit wom yima yuhur
be yindhorhato tonemof
disaiperroh kfo nuhass.



Tone hanyhato buha Jisasrpno
mnafurhato kfo memorf, "Hifa
dbhayer." Be rof inji wanyhato
yauyaknimofn, rorhu wuram
rimakitohhato kfo hbraumofr.





Kto wuroht tu Jisasrhu 11-pela disaiperm nuwa ye
hasetmn mifnahmotr htimomr. Yihato kfo huttmorm.

Ror htiyafomoa yimam kfomoahat nhai wany
yakiormoam. Memom, ka be kfo furewum. Ndnatn kfo
huttmorm. Bro Nungothen Jisasr nd mrokfom kfo
buganihato be Bro Nkifrar yakhato hamuhmorr
hefenko. Hamuhmorrn turhu bro bbukeft yorhwa
tirmifko fak htamorr.



Bro Nkifrar ndar
bbinysof thofm be tu mfro marbit hta
mifmorm. Ndnetrn nd rorhu rpa yon
mifr tuhemorm. Memor, 'Inji
anakahta, fitoh yimam rorn
rroh dukefm htemm, be nhai
nohruhatm. Nhai. Be inji
tahi nrwim kanjo toh
nkifranirahm.'



Rom 3:23 Kmi kmi buganom bi fasoh fasoh nefmn kasimotmnom to be Bro Nkifrar frtrohmornom. Nhai nompno brbo niarmoar.

Rom 6:23 Fasoh fasoh nefmn yimam yak hatohewatmm hel kitwom. Bro Nkifrar yak hatohewi-watrm nmoh Nungothen Jisas Kraiser-pno toh nkifranirahm.

Hibru 9:27 Ndar bbinysoft tohwa yimam nhai tahi nrwim kanjo toh nkifranikahm. Nhai. Nohwom. Nohnitamn Bro Nkifrarhu kotkfot toh garitwom.

Efesus 2:8,9 Ndt nhai tukomn fitoh fitoh yuham yihato Bro Nkifrar htihato yakmiyakrmorko. Nhai. Ndnnettn mirahr wom yimar sinyakahann akfo hagrhaya. Nikmoh yima yuhum Kraiser bro dukefm htahato hikmo yuhatn Bro Nkifrar hti yuhuwafhato fakmorko.



Rom 10:9,10 Ptha nuhashato kfiwunom, "Kfo mirahn,
'Jisasr nanhu Nungotheter,' yo ninhu dukeft duka
mirahn, Jisasr nohmohat Bro Nkifrar kasinya mifmorr,
inji dukarahn, Bro Nkifrar yakruharn rorhu tirmn
htarahrn."

Nmoh yima yuhumio, Bro Nkifrarhu dukefrpar yorhwatm
Bro Nkifrar yak wus bowushato hti wuthewurnom. Yo
tnge kfo kangnom, Jisasr nmoh Nungotheter. Inji
kfiwunom, Bro Nkifrar wanyhato be yekwarnom rorhu
tirtn htewurnom.

Jon 3:16,17 Bro Nkifrar ndar bbinysof thofm be tu
mfro marbit hta mifmorm. Ndnetrn nd rorhu rpa yon
mifr tuhemorm. Memor, 'Inji anakahta, fitoh yimam rorn
rroh dukefm htemm, be nhai nohrumatm. Nhai. Be inji
tahi nrwim kanjo toh nkifranirahm.'



Bro Nkifrar nhai turhu Yonr ndar bbinysofthu met yindariroh nefroh kothu yakitoh hanyeftn kfo tkruraf-rmorr. Nhai. Rroh nrfa hbhakneftn kfo tkrurafmorr.

1 Jon 5:11-13 Yimaroh toh nkifraniyuk yihotar Bro Nkifrar bi fak hta bohtamorr. Turhu yonrn yura bgre mis nohhato nd yimam toh nkifraniyuk yihotat fak manyakmort. Bro Nkifrar n yihotar inji fak hta nuhasmornom. Yimam nd Bro Nkifrarhu yonrpno frtkafwam, nd yimamn toh nkifraniyuk yafothar kekwomr. Yimam nhai Bro Nkifrarhu yonrpno frtkafkahn, nd yimam nhai toh nkifraniyuk yafothar yakkahn. Niko Bro Nkifrarhu yonr hikwa tuhan yindariko mirahko bok dukefm yakhato kfo amanyom, "Nd toh nki-franiyuk yafothat ka bi hatohwonomt o ka nhai?" Mirahko ndhtet bok dukefm ayaknom. Nd toh nkifraniyuk yafothat bi fakmokomt. Ndar gontwat to ndthu kfo dukayuk gontwatn kahukanko.



Matyu 26-28; Luk 22-24; Jon 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen.

Alamblak Bible (amp) © 2003, Wycliffe Bible
Translators, Inc. All rights reserved.

<https://www.bible.com/bible/986/MAT.1>

©2024 Bible for Children, Inc.

www.M1914.org

www.bibleforchildren.org

